

經籍典第四百九十七卷

類書部彙考一

魏

文帝黃初 年使諸儒撰集經傳隨類相從號曰皇覽 按魏志文帝本紀初帝好文學以著述爲務自所勒成垂百篇又使諸儒撰集經傳隨類相從凡千餘篇號曰皇覽 按楊俊傳注魏略曰王象字義伯爲俊所知拔果有才志建安中與同郡荀緯等俱爲魏太子所禮待及王粲陳琳阮瑀路粹等亡後新出之中惟象才最高魏有天下拜象散騎侍郎遷爲常侍封列侯受詔撰皇覽使象領祕書監從延康元年始撰集數歲成藏於祕府合四十餘部部有數十篇通合八百餘萬字象旣性器和厚又文采溫雅用是京師歸美稱爲儒宗

宋

後廢帝元徽元年七月丁丑顧長康何翌之表上諫林十二卷 按宋書廢帝本紀元徽元年七月丁丑散騎常侍顧長康長水校尉何翌之表上所撰諫林上自虞舜下及晉武凡十二卷

北魏

太祖天興四年十二月集博士儒生比衆經文字義類相從 按魏書太祖本紀天興四年冬十二月集博士儒生比衆經文字義類相從凡四萬餘字號曰衆文經

北齊

後主武平三年二月敕撰元洲苑御覽八月御覽成敕付史閣 按北齊書後主本紀武平三年二月敕撰元洲苑御覽後改名聖壽堂御覽八月聖壽堂御覽成敕付史閣後改爲修文殿御覽 按封隆之傳隆之弟子孝琰字士光祖珽輔政奏令入文林館撰御覽孝琰文筆不高但以風流自立善於談謔威儀閑雅容止進退人皆慕之 按陽休之傳休之本懷平坦爲士友所稱晚節說祖珽撰御覽書成加特進及珽被黜便布言於朝廷云先有嫌隙及鄧長顓顏之推奏立文林館之推本意不欲令耆舊貴人居之休之便相附會與少年朝請叅軍之徒同入待詔 按隋書魏澹傳澹爲齊殿中侍御史與諸學士撰御覽書成除中書舍人

唐

高祖武德五年詔令狐德棻等撰藝文類聚 按唐書高祖本紀不載 按舊唐書令狐德棻傳德棻博涉文史早知名武德五年與陳叔達等受詔撰藝文類聚

武德七年復詔歐陽詢等撰藝文類聚 按唐書高祖本紀不載 按舊唐書儒學歐陽詢傳詢博

覽經史尤精三史武德七年詔與裴矩陳叔達撰藝文類聚一百卷奏之賜帛二百段

太宗貞觀 年勅高士廉等撰文思博要 按唐書太宗本紀不載 按通志文思博要一千二百

卷高士廉等奉勅編

元宗開元 年詔徐堅等撰初學記 按唐書元宗本紀不載 按馬端臨文獻通考初學記三十

卷唐徐堅等撰初張說類集事要以教諸王開元中詔堅與韋述余欽施本張烜李銑孫季良分門撰次

宋

太宗太平興國二年詔李昉等以前代修文御覽諸書編爲一千卷又以野史雜編爲五百卷 按宋史太宗本紀不載 按玉海實錄太平興國二年三月戊寅詔翰林學士李昉扈蒙左補闕知制

誥李穆太子少詹事湯悅太子率更令徐鉉太子中允張洎左補闕李克勤右拾遺宋白太子中允陳諤光祿寺丞徐用賓大府寺丞吳淑國子寺丞舒雅少府監丞呂文仲阮思道等十四人同以前代修文御覽藝文類聚文思博要及諸書分門編爲一千卷又以野史傳記小說雜編爲五百卷

太平興國三年太平廣記書成

按宋史太宗本紀不載

按玉海太平興國二年三月詔李昉等

取野史小說集爲五百卷三年八月書成號曰太平廣記其太平御覽太平廣記二書所命官皆同唯克勤用賓思道改他官續命太子中允王克正董淳直史館趙鄰幾預焉

太平興國六年詔以太平廣記鏤板

按宋史太宗本紀不載

按玉海三年八月書成號曰太平

廣記六年詔令鏤板

二年三月戊寅所集八年十二月庚子刻成廣記鏤板頒天下言者以爲非

學者所急墨板藏太清樓

太平興國八年詔以所修太平總類改名太平御覽

按宋史太宗本紀不載

按玉海太平興國

八年十一月庚辰詔史館所修太平總類一千卷宜令日進三卷朕當親覽焉自十二月一日爲始

宰相宋琪等言曰天寒景短日閱三卷恐聖躬疲倦上曰朕性喜讀書頗得其趣開卷有益豈徒然

也因知好學者讀萬卷書非虛語耳十二月庚子書成凡五十四門詔曰史館新纂太平總類一千卷包括羣書指掌千古頗資乙夜之覽何止名山之藏用錫嘉稱以傳來裔可改名太平御覽戊申上於禁中讀書一云清心殿自已時至申時始罷有蒼鶴自上始開卷飛止殿鴟尾逮掩卷而去上怪之以語近臣宰相宋琪對曰此上好學之感也昔楊震方講間有鵲銜三鱣魚墮於庭中亦同其應會要云先是帝閱類書門目紛雜遂詔修此書書目云雜采經史傳記小說自天地事物迄皇帝王霸編分類次

真宗景德 年詔楊億王欽若等修冊府元龜 按宋史真宗本紀不載 按杜鎬傳景德初預修

冊府元龜 按楊億傳會修冊府元龜與王欽若總其事

仁宗天聖 年詔晏殊等撰天和殿御覽 按宋史仁宗本紀不載 按文獻通考天和殿御覽四

十卷侍讀學士臨川晏殊等撰天聖中受詔取冊府元龜掇其要者分爲一百一十五門天和者禁中便殿也

嘉祐七年夏國主獻馬求冊府元龜 按宋史仁宗本紀嘉祐七年四月己丑夏國主諒祚獻馬求

賜書詔賜九經還其馬

按玉海夏國傳嘉祐五年上書自言慕中國衣冠明年當以此迎使者

明年獻方物表求太宗御製草詩隸書石本且進馬五十匹求九經唐史冊府元龜及宋正至朝賀儀詔賜九經還所獻馬

高宗紹興二十

年命鄭樵進通志

按宋史高宗本紀不載

按儒林鄭樵傳樵字漁仲莆田人

好著書初爲經旨禮樂文字天文地理蟲魚草木方書之學皆有論辨紹興十九年詔藏祕府後監潭州南嶽廟給札歸抄所著通志書成入爲樞密院編修官高宗幸建康命以通志進會病卒年五十九學者稱夾漈先生

光宗紹熙

年取韓彥直水心鏡以進

按宋史光宗本紀不載

按韓彥直傳彥直嘗撫宋朝事

分爲類目名水心鏡爲書百六十七卷禮部尙書尤袤修國史白於朝下取是書以進光宗覽之稱善

金

章宗泰和四年命編類陳言文字

按金史章宗本紀泰和四年八月庚子詔完顏綱喬宇宋元吉

等編類陳言文字其言涉宮庭若大臣省臺大部各以類從凡二千卷 按完顏綱傳泰和四年詔綱與喬宇宋元吉編類陳言文字綱等奏凡關涉宮庭及大臣者摘進其餘以省臺大部各爲一類凡二千卷

元

文宗天曆二年立奎章閣置藝文監命儒臣纂修經世大典 按元史文宗本紀天曆二年九月戊辰勅翰林國史院官同奎章閣學士采輯本朝典故準唐宋會要著爲經世大典 按揭傒斯傳天曆初開奎章閣首擢爲授經郎以教勳戚大臣子孫與修經世大典特授藝文監丞參檢校書籍事 按歐陽元傳初置奎章閣學士院又置藝文監隸焉皆選清望官居之文宗親署元爲藝文少監奉詔纂修經世大典陞太監檢校書籍事

至順元年八月以次宴纂修經世大典官 按元史文宗本紀至順元年春正月丙辰命趙世延趙世安領纂修經世大典事二月庚寅以經世大典久無成功專命奎章閣阿鄰帖木兒忽都魯都兒迷失等譯國言所紀典章爲漢語纂修則趙世延虞集等而燕鐵木兒如國史例監修辛卯奎章閣

學士忽都魯都兒迷失撒迪虞集辭職詔諭之曰昔我祖宗睿知聰明其於致理之道自然生知朕以統緒所傳實在渺躬夙夜憂懼自惟早歲跋涉艱阻視我祖宗既乏生知之明於國家治體豈能周知故立奎章閣置學士員日以祖宗明訓古昔治亂得失陳說於前使朕樂於聽聞卿等其推所學以稱朕意其勿復辭甲午置奎章閣監書博士二人秩正五品九月己亥以奎章閣纂修經世大典命省院臺諸司以次宴其官 按趙世延傳至順元年詔世延與虞集等纂修皇朝經世大典世延屢奏臣衰老乞解中書政務專意纂修帝曰老臣如卿者無幾求退之言後勿復陳 按虞集傳有旨采輯本朝典故倣唐宋會要爲經世大典命集與中書平章政事趙世延同任總裁集言禮部尙書馬祖常多聞舊章國子司業楊宗瑞素有曆象地理記問度數之學可共領典翰林修撰謝端應奉蘇天爵太常李好文國子助教陳旅前詹事院照磨宋褰通事舍人王士點俱有見聞可助撰錄庶幾是書早成帝令閣學士專率其屬爲之

明

太祖洪武 年命儒臣編輯諸類書 按明野史紀聞太祖卽位後命儒臣編輯各部類書以爲訓

誠洪武元年命學士朱升等修女誠六年命中書省官修皇明祖訓纂爲目十有三曰箴戒持守祭祀出入國政禮儀法律內令內官職制兵衛營繕供應因錄於謹身殿東廡乾清宮東壁以示子孫又爲儲君昭鑑錄七年冬撰孝慈錄八年御製資世通訓凡十四條十三年命儒臣纂臣誠錄十五年命侍讀火原潔等編譯語十六年命吳沉等撰精誠錄集古今經傳敬天忠君孝親格言類輯以便觀覽十九年命儒臣劉三吾撰省躬錄編輯漢唐以來災異之應於臣下著著爲是書又撰存心錄輯歷代帝王祭祀祥異感應者著爲書二十一年撰武士訓誠錄命儒臣編輯二十五年撰永鑑錄太祖輯歷代帝室諸王爲惡者類編賜諸王又撰世臣總錄輯歷代人臣善惡可勸懲者著爲書以頒中外臣子二十九年撰稽古定制太祖以臣下踰制越禮命翰林斟酌唐宋制度爲書一卷三十年撰爲政要錄凡十三條

太宗承樂 年命儒臣編輯類書

按明野史紀聞成祖卽位後復命儒臣編輯各部類書永樂元

年撰列女傳以孝慈皇后刪定列女傳未就命儒臣重加編次分爲三卷二年撰文華寶鑑錄輯古來嘉言善行有益儲訓者彙成是書三年撰內訓仁孝皇后著自德性以及慈幼爲目二十爲本七

十有八五年撰永樂大典十四年撰歷代名臣奏議命楊士奇等輯十七年撰爲善陰騭凡一百八十本共闕百六十五人十八年撰孝順事實凡一百五十卷共二百七人

永樂五年十一月永樂大典成

按明肇運紀永樂五年十一月太子少師姚廣孝等進重修文獻

大成更賜名永樂大典上爲序

按王圻續文獻通考成祖命解縉纂集古今經史子集百工技

藝爲書名文獻大成至永樂五年以爲未備復命姚廣孝劉季篴解縉等徵四方宿儒重加增輯計

二萬二千九百卷一萬一千一百本

按永樂大典一條已詳載經籍總部

宣宗宣德 年命儒臣編輯類書

按明野史紀聞宣宗卽位後復編輯各部類書宣德元年御製

歷代臣鑑三年御製帝訓自君德至藥餌共二十五類又輯五倫書六十二卷正統十三年英宗始

鈐梓以廣其傳

孝宗弘治十六年詔修大明會典

按續文獻通考大明會典弘治十六年命儒臣纂成凡一百八

十卷嘉靖三十八年重修未刻

按明外史陳濟傳潘辰景寧人弘治六年詔天下舉懷才抱德

隱於山林者府尹唐恂舉辰爲翰林待詔掌典籍事預修會典成進五經博士 按張元禎傳遷南

京侍講以養母歸久之召爲會典副總裁至則進學士充經筵日講官 按傅珪傳弘治中授編修尋兼司經局校書與修大明會典書成遷左中允 按楊廷和傳會典成超拜左春坊大學士 按梁儲傳儲擢翰林學士同修會典遷少詹事 按毛澄傳弘治六年進士第一授翰林修撰預修會典成進右諭德 按沈鯉傳會典成加太子少保

武宗正德 年劉瑾摘會典小疵貶官奪祿有差 按明外史陳濟傳正德中劉瑾摘會典小疵貶

濟爲典籍 按李東陽傳正德三年焦芳旣與中人爲一王璽辭位東陽勢益孤東陽前已加少師

兼太子太師後瑾欲加芳官詔東陽食正一品祿久之摘會典中譌謬奪所加祿 按傅珪傳武宗

立進左諭德充講官時詞臣不附劉瑾瑾惡之謫會典訛字貶鑄與修者官降珪修撰 按顧清傳

弘治五年舉鄉試第一明年成進士歷侍讀正德初劉瑾摘會典小誤挫諸翰林清降編修 按梁

儲傳正德初進尙書坐劉瑾摘會典小疵降右侍郎 按毛紀傳武宗立改左諭德坐會典小誤降

侍讀 按毛澄傳正德四年劉瑾摘會典小疵貶諸纂修者秩以澄爲侍讀 按王守仁傳父華累

南京吏部尙書以會典小誤降右侍郎

世宗嘉靖 年鄭自璧請輯類書以備觀覽 按明外史鄭自璧傳世宗踐祚中外競言時政自璧請采有關化理者類輯成書以備觀覽從之

神宗萬曆六年復修大明會典 按續文獻通考萬曆六年復修大明會典 按明外史余繼登

傳萬曆五年進士改庶吉士授檢討與修會典成進修撰

萬曆 年命儒臣以祖宗寶訓實錄分類成書 按明外史張居正傳帝初政居正嘗纂古治亂事

百餘條繪圖以俗語解之使帝易曉至是復屬儒臣紀太祖列聖寶訓實錄分類成書凡四十曰創

業艱難曰勵精圖治曰勤學曰敬天曰法祖曰保民曰謹祭祀曰崇孝敬曰端好尚曰慎起居曰戒

遊佚曰正宮闈曰教儲貳曰睦宗藩曰親賢臣曰去奸邪曰納諫曰理財曰守法曰儆戒曰務實曰

正紀綱曰審官曰久任曰重守令曰馭近習曰待外戚曰重農桑曰興教化曰明賞罰曰信詔令曰

謹名分曰裁貢獻曰慎賞賚曰敦節儉曰慎刑獄曰褒功德曰屏異端曰飭武備曰御戎狄其辭多

檢切

唐歐陽詢藝文類聚一百卷

按詢自序夫九流百氏爲說不同延閣石渠架藏繁積周流極源頗

難尋究披條索貫日用弘多卒欲摘其菁華採其旨要事同游海義等觀天皇帝命代膺期撫茲寶運移澆風於季俗反淳化於區中戡亂靖人無思不服偃武修文興開庠序欲使家富隋珠人懷荆玉以爲前輩綴集各抒其意流別文選專取其文皇覽偏略直書其事文義旣殊尋檢難一爰詔撰其事且文棄其浮雜刪其冗長金箱玉印比類相從號曰藝文類聚凡一百卷其有事出於文者便不破之爲事故事居其前列文於後俾夫覽者易爲功作者資其用可以折衷今古憲章墳典云爾

太子率更令弘文館學士渤海男歐陽詢序

按明湯聘尹重刊序夫博文游藝聖有格言類聚

羣分學知體要誠郢斤之權輿庖刀之托始也隋唐以後用籍滋繁類藻競芳無慮數百然狎今者未聞搜古喜艷者未免涉俚誠欲崇雅還淳孰踰率更裁次哉考信六藝旁採百家事旣星攢文亦霞燦備五聲之音響而冠冕雍容羅萬彙之流形而湘綺絢爛靈虵可握崑丘之片玉罔遺荆棟悉收鄧林之一枝不棄析門啟徑分路揚鑣所謂性情之風標神明之律呂非歟然皆昉於羲黃逮於江左迺品格之高邁不獨旨調之英芬也豈非最善於稽古而有功於範後哉涉海一航量天寸尺

信不虛矣舊帙流傳騷人膾炙然銅鈐者動而易舛木裏者久而易磨矧又有杜往來之索而甘焚
劉之舉者哉斯志士所大痛才人所共惜也王子孟起嫺於文詞閱覽博觀篤信好古銳情詳核命
匠精攻庶乎游海不眩於迷津觀天不淆於霾障頓令石渠生色何啻鄴架改觀屈宋復生亦當首
肯沈謝再出必且神怡是率更有大造於後學而孟起又羽翼夫率更也顧不偉哉且天水胡公以
嘉靖丁亥而始事於蘇苑今日下王氏以萬曆丁亥而告成於秦淮甲子一周是書大顯孰謂非斯
文之幸耶吾於是有感

王元貞重刊
湯爲作叙

柳宗直西漢文類

卷

按柳宗元序左右史混久矣言事駁亂尙書春秋之旨不立自左丘明傳

孔氏太史公述歷古今合而爲史記迄於今交錯相糺莫能離其說獨左氏國語紀言不參於事戰

國春秋後語頗本右史尙書之制然無古聖人蔚然之道大抵促數耗矣而後之文者寵之文之近
古而尤壯麗莫若漢之西京班固書傳之吾嘗病其畔散不屬無以考其變欲采此義會年長疾作
驚墮愈日甚未能勝也幸吾弟宗直愛古書樂而成之搜討磔裂攬撫融結離而同之與類推移不
易時月而咸得從其條貫森然炳然若開羣玉之府指揮聯累圭璋琮璜之狀各有列位不失其序

雖第其價可也以文觀之賦頌詩歌書奏詔策辨論之辭畢具以語觀之則右史記言尙書戰國策成敗興衰之說六備無不苞也噫是可以爲學者之端邪始吾少時有路子者自贊爲是書吾嘉而叙其意而其書終莫能具卒俟宗直也故刪取其說繫於左以爲西漢文類紀殷周之前其文簡而楚魏晉而降則盪而靡得其中者漢氏漢氏之東則旣衰矣當文帝時得賈生明儒術武帝尤好焉而公孫弘董仲舒司馬遷相如之流作風雅益盛敷施天下自天子至公卿大夫士庶人咸通焉於是宣於詔策達於奏議諷於辭賦傳於歌謠由高帝訖於哀平王莽之誅四方之文章蓋爛然矣史臣班孟堅修其書拔其尤者充於簡冊則二百三十年間列辟之達道名臣之大範賢能之志業黔黎之風俗列焉若乃合其英精離其變通論次其叙位必俟學古者興行之唐興用文理貞元文章特盛本之三代浹於漢氏與之相準於是有能者取孟堅類其文次其先後爲四十卷

杜佑通典二百卷

按李翰序儒家者流博而寡要勞而少功何哉其患在於習之不精知之不明

入而不得其門行而不由其道何以徵之夫五經羣史之書大不過本天地設君臣明人倫五教之義陳政刑賞罰之柄述禮樂制度之統究治亂興亡之由立邦之道盡於此矣非此典者謂之無益

世教則聖人不書學者不覽懼冗煩而無所從也先師宣尼祖述堯舜憲章文武七十子之徒宣明大義三代之道百世可師而諸子云云猥復制作由其門則其教已備反其道則其人可誅而學者以多聞爲廣見以異端爲博聞是非紛然湏洞茫昧而無條貫或舉其中而不知其本原其始而不要其終高談有餘待問則泥雖驅馳百家日誦萬字學彌廣而志彌惑聞愈多而識愈疑此所以勤苦而難成殆非君子進德修業之意也通典之作昭昭乎其警學者之羣迷歟以爲君子致用在乎經邦經邦在乎立事立事在乎師古師古在乎隨時必參古今之宜窮終始之要始可以度其終古可以行於今問而辨之端如貫珠舉而行之審如中鵠夫然故施於文學可爲通儒施於政事可建皇極故採五經羣史上自黃帝至於有唐天寶之末每事以類相從舉其始終歷代沿革廢置及當時羣士論議得失靡不條載附之於事如人支脉散綴於體凡有八門號曰通典非聖人之書乖聖人微旨不取焉惡煩雜也事非經國禮法程制亦所不錄棄無益也若使學者得而觀之不出戶知天下未從政達人情罕更事知時變爲功易而速爲學精而要其道直而不徑其文詳而不煩推而通放而準語備而理盡例明而事中舉而措之如指諸掌不假從師聚學而區以別矣非聰明獨見